

Let's Move for Mental Health 5th Gold Mine Walk and Run un gran éxito



Riba diadomingo 20 di oktober 2024 a tuma lugar e di 5 edicion di e Gold Mine Walk and Run, cual e aña aki tabata tin como tema: "Let's Move for Mental Health" cual a surpasa tur expectativa di e organisadornan y participantenan.

E evento aki a wordo organisa danki na e union di diferente organisacionnan na Aruba cu ta comparti e mesun vision, yuda nos comunidad pa tin un miho bida for di e punto

di salud mental. E organisacionnan cu a uni ta: Respaldo, Stichting Hunto, FADA y Healthy Lifestyle.

E "Gold Mine Walk and Run" a cuminsa 5 aña pasa cu apenas 200 participante y a keda crece tur aña. Awe, ta increíblemente orguyoso pa bisa cu riba diadomingo 20 di oktober 2024 a logra haci un evento cu mas di 750 persona, cual ta inclui participante y boluntarionan. Tur e personanan aki a bini hunto pa

un causa importante, move pa asina yuda e salud mental. E ta inspirante pa mira con comunidad a brasa e evento. Sigur e éxito aki no por a wordo logra sin ayudo di e partnernan fenomenal. Masha danki na tur hende cu a kere den e iniciativa aki y pa yuda nos haci un cambio real. Un danki special ta bay sigur na Patrishi Sports cual a inicia e evento aki 5 aña pasa y a laga e organisacionnan di salud mental tuma esaki over pa e aña aki.



Salud mental ta algo cu por toca nos tur y door di core, cana y move hunto, nos ta sigui manda e mensahe cu ta OK pa busca ayudo y cuida nos mesun bienestar. Ban sigui haci e esfuerzo pa kita e stigma y pa mantene e combersacion bibo!

Un felicitacion grandi ta bay na e ganadornan, pero en especial na tur persona cu a participa y asina a tuma

un tempo pa nan mes y nan salud mental.

Na nomber di Respaldo, Stichting Hunto, FADA, Healthy Lifestyle y Patrishi Sports, un biaha mas danki Aruba y nos ta invita e comunidad pa keda activo y sigui tur nos plataforma di medianan social pa siña mas tocante con por keda mentalmente sano.

Departamento di Cultura di Aruba:

Na memoria di e legendario musico di Aruba, Boycy Croes



Boycy Jacobo Federico Croes a nace dia 10 di oktober 1931 di su mayornan Fanfa Croes y Maria Croes, ambos den feliz memoria. Boycy tabata casa cu Sra. Aura Clarita Lopez y for di e matrimonio a nace Arline, Francis den feliz memoria y Clarine.

Den decada di 70, Boycy tabata conoci pa su famoso 'Carniceria Aruba' cu tabata na e crusada di Nieuwstraat

cu Kruisweg. E tabata haya su clientenan vast cu tabata admir'e pa su forma di selecciona carni y su trato na clientenan. Boycy Jacobo Federico Croes, aunke su nomber oficial ta Boycy, toch hopi hende tabata skirbi 'Boysie' ora ta referi na dje, su famia y amistadnan cercano tambe ta usa 'Boysy' ora di skirbi di dje. Boysy tabata tambe un figura farandulero cu a cuminsa toca na edad di 14 aña na Radio Kelkboom cu 'Trio Oriental' y despues cu 'Cuar-



teto Melodico Criollo'.

Den su trayectoria Boysie a toca cu varios otro grupo musical y por menciona cu en total el a graba alrededor di 14 disco (45 rpm) cualnan e tempo ey tabata masha popular. Boysie tabata un legendario musico stima di pueblo, un compositor, arreglista y cantante. Sea e ta anima un fiesta tocando y cantando su so of cu su mesun grupo musical yama 'Conhunto Crioyo'.

Asina e tabata entretene durante fiesta y presentacionnan, tocando su cuarta of

su organ synthesizer. Durante su trayectoria musical, Boysie a compone numeroso cancion di dje mes, cualnan a bira hit y te ainda ta wordo toca. Su forma chistoso di adapta cancionnan, a pone cu Boysy a keda popular y tabata graba cancionnan cu ta sigui resona tur caminda.

E toque chistoso den su cancionnan tabata haci cu nan ta bira favorito den pueblo. Boysy tambe a participa den Festival di Tumba, Calypso y Roadmarch, cu e meta pa engrandece nos cultura, incluyendo e celebracion di nos

Carnaval. E cancionnan di Boysie no a pega solamente na Aruba, pero tambe na otro islanan den Caribe y Hulanda. Ultimo 10 añanan Boysy a bay biba cu su famia na Merca. Despues di un temporada di enfermedad, dia 6 di juni ultimo el a fayece den su sueño. Ministerio di Cultura y Departamento di Cultura ta expresa palabranan di condolencia y forsa na Sra. Aura Clarita Lopez, su yunan Arline, Clarine y demas famia y amistadnan.

Cu Boysie sosega na paz den Reino di Señor.